



Senin, 10 Januari 2023
Ogen: Hosea 1:10-2:1



"Nggeluh Senang"



“Nggeluh senang” eme sada pilihan man banta si ibereken Dibata guna banci sialoken. Janah pilihan e tergantung ku bas caranta ngaloken dingan ndalanisa. Lit kita si ndalani kegeluhen senang e alu ngenehen ku bas perjuangan si nggo iperjuangkan janah lit ka nge kita ndalanisa erkiteken kitik-kitikta nari kin kita nggo nggeluh alu senang. Melala hal si erbahansa ukur senang si mpeturah ate malem i tengah-tengah kegeluhen, umpamana: keluarganta kerina lit i bas sehat ras mejuah-juah; kai si iarapkan kita bagi sura-suranta; berita si ibegi kita kerna persekolahen/perkuliahen/pendahin anak-anak; kesuksesen usaha/bisnista; terdungi janah tergalari kita pinjaman ku bank ras sidebanna. Artina memang maka melala hal-hal si erbahan nggeluhta senang seh maka mpeturah keriahen.

Bangsa Israel pe ngalami keriahen i bas perdalanan kegeluhenna. Rikutken teks paksa tenengta wari enda, maka Dibata ngatakan bangsa Israel “la kam bangsangKu”. Kalimat enda ikatakan Dibata erkiteken bangsa Israel nggeluh selaku bangsa la nandai Dibata, nggeluh selaku bangsa si perukureнна bagi sura-surana saja; tapi ibas paksana rikutken rancangan Dibata, maka nina Dibata erkelang-kelangken Nabi Hosea “Kam kap anak-anak Dibata si Nggeluh”. Dibata ngerubah dingan ngangkatken status bangsa Israel seh maka bangsa e enggejapkan keriahen i bas perdalanan geluhna. Perubahen status enda jadi erkiteken kekelengen Dibata nandangi bangsaNa la pernah erleka. Janah perubahen status enda erbahansa bangsa Israel ngalami kegeluhen senang.

Kita pe megati bagi bangsa Israel, nilah kita arah sura-sura Dibata, nggeluh kita bagi ate-ateta saja ras la siikutken undang-undang Dibata, kerina e erbahanca ate mesui; tapi keleng ate Dibata tetap nge ngakui dingan ngangkat statusta jadi anak-anakNA si erbahansa geluhta senang dingan dem alu keriahen.